

Kita perlu lebih ramai profesional data: Dr M

Permintaan bakat berkualiti tinggi kian meningkat sejajar keperluan statistik negara

Oleh Mohd Azrone Sarabatin dan Che Wan Badrul Alias
bhnews@bh.com.my

Kuala Lumpur: Malaysia memerlukan lebih banyak profesional data yang boleh memahami kumpulan data besar dan kompleks, meliputi semua kemahiran statistik serta ilmu komunikasi dan maklumat (ICT).

Perdana Menteri, Tun Dr Mahathir Mohamad, berkata permintaan kepada bakat berkualiti tinggi dalam bidang itu semakin meningkat dengan ketara, sejajar usaha kerajaan dan swasta melaksanakan proses penambahbaikan yang memerlukan pandangan jangkaan serta analisis.

Justeru, katanya, keperluan melaksanakan pelaburan strategik bagi menambah kepakaran itu penting untuk meningkatkan keupayaan kajian dan analisis tempatan, terutama dalam kalangan komuniti statistik negara.

"Ini mewujudkan cabaran baru kepada komuniti statistik bagi memanfaatkan potensi revolusi digital dan mengenal pasti peluang untuk mengukuh dan mempertingkatkan sistem statistik nasional.

"Maka, cara paling pintar untuk mendepani cabaran ini adalah dengan meneroka sepenuhnya potensi Analisis Data Besar (BDA) yang memiliki jumlah da-



Dr Mahathir diiringi Ketua Perangkawan Jabatan Perangkaan Malaysia, Datuk Seri Dr Mohd Uzir Mahidin, merasmikan Kongres Statistik Sedunia Institut Statistik Antarabangsa ke-62 di Kuala Lumpur, semalam.

[Foto BERNAMA]

ta besar, mendalam dan pelbagai, selain aspek paling utama adalah nilai data yang mampu dijana-nya," katanya.

Dr Mahathir berkata demikian ketika menyampaikan ucapan merasmikan Majlis Pembukaan Kongress Statistik Dunia (WCS) Institut Statistik Antarabangsa (ISI) ke-62, di sini, semalam.

Yang turut hadir, Menteri Hal Ehwal Ekonomi, Datuk Seri Mohamed Azmin Ali dan Gabenor Bank Negara Malaysia (BNM), Datuk Nor Shamsiah Mohd Yunus.

Dalam perkembangan berkaitan, Perdana Menteri berkata, Jabatan Perangkaan Malaysia akan mengambil langkah menerajui penerapan BDA kerajaan dengan bantuan dan kerjasama semua kementerian, agensi serta badan berkanun di Malaysia.

Katanya, sistem statistik nasional kini menerapkan potensi

BDA dalam beberapa bidang, terutama statistik harga dan barang dagangan, sekali gus perlu terus digalakkan.

Sementara itu, Mohamed Azmin ketika berucap pada majlis sama, berkata Malaysia akan terus berhati-hati mendepani cabaran ekonomi dengan mengekalkan disiplin fiskal yang di-

"Cara paling pintar untuk mendepani cabaran ini adalah dengan meneroka sepenuhnya potensi Analisis Data Besar.

Dr Mahathir Mohamad,
Perdana Menteri

laksanakan kerajaan kini bagi menggalakkan pertumbuhan ekonomi negara.

Katanya, BNM pada minggu lalu mengumumkan ekonomi Malaysia kekal berdaya tahan menerusi pertumbuhan mengagumkan 4.9 peratus walaupun ekonomi serantau terjejas dengan ketidaktentuan global.

"Perdana Menteri berkali-kali menegaskan walaupun angka Keluaran Dalam Negara Kasar (KDNK) itu menunjukkan pengukuhan ekonomi, penekanan kepada usaha meningkatkan kuasa beli rakyat perlu diteruskan.

"Fokus ini akan diterapkan dalam tema Kemakmuran Bersama yang menjadi asas Rancangan Malaysia Ke-12 yang menetapkan sasaran mendekatkan jurang kelompok pendapatan, bangsa dan kawasan bandar dengan luar bandar," katanya.